



Broj:02-04-865/22

Datum, 22.08.2022.godine

## **ZAPISNIK** sa 18. redovne sjednice 7. saziva Općinskog vijeća Doboj Istok

Osamnaesta redovna sjednica 7. saziva Općinskog vijeća održana je dana 30.06.2022. godine u zgradi općine Doboj Istok u Klokočnici sa početkom u 10,00 sati.

**PRISUTNI:** 16 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Samir Mujkić, ovlašteno lice da zamjenjuje pomoćnika općinskog načelnika za poduzetništvo i financije, Sulejman Delić, pomoćnik općinskog načelnika za civilnu zaštitu, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko invalidsku zaštitu i opću upravu, Elmir Babić, direktor JKP „Čisto“ d.o.o. Doboj Istok, Kenan Mujkić, direktor JZU Dom zdravlja Doboj Istok, te predstavnik Televizije Tuzlanskog kantona.

**ODSUTNI:** Zerina Subašić, predsjednica kluba vijećnika PDA – NL Doboj.

Sjednicu je otvorio predsjedavajući Općinskog vijeća, Nusret Dautović.

Nusret Dautović, predsjedavajući Općinskog vijeća: „Otvaram 18. redovnu sjednicu 7. saziva Općinskog vijeća Doboj Istok i koristim priliku da poselamim i pozdravim općinskog načelnika, vijećnike Općinskog vijeća Doboj Istok, predstavnike Javnog komunalnog preduzeća „Čisto“, JZU Dom zdravlja i Mjesne zajednice Mala Brijesnica, te pomoćnike općinskog načelnika. Prije nego što krenemo zamolio bih tehničkog sekretara da utvrdi broj prisutnih na današnjoj sjednici. Znači trenutno je prisutno 15 vijećnika, Zerina Subašić je javila da ne može prisustvovati zbog posla, a vidjet ćemo Senada Džanić hoće li doći.“

### **USVAJANJE ZAPISNIKA SA PRETHODNE SJEDNICE OPĆINSKOG VIJEĆA**

Nusret Dautović, predsjedavajući Općinskog vijeća: „Dobili ste Zapisnik sa 17. Redovne sjednice 7. saziva Općinskog vijeća Doboj Istok i pitam prisutne vijećnike da li nekome nešto nije jasno? Ukoliko se niko ne javlja zamolio bih za glasanje. Ko je za ovakav zapisnik?“

Glasanje: ZA – 15, PROTIV – 0, UZDRŽANIH – 0.

### **VIJEĆNIČKA PITANJA**

Nusret Dautović, predsjedavajući Općinskog vijeća: „ Pitao bih vijećnike ima li neko pripremljeno vijećničko pitanje?“

Emira Karić, predsjednica kluba vijećnika SDP: „ Poštovani, sve bih vas srdačno pozdravila. Ja sam za današnju sjednicu pripremila jedno vijećničko pitanje. To je zapravo trebala biti vijećnička inicijativa, ali još uvijek nemamo mogućnosti da podnosimo vijećničku inicijativu, odnosno nije usklađen Poslovnik o radu Općinskog vijeća Doboj Istok. Tako da sam ja vijećničku inicijativu pretvorila u vijećničko pitanje a koje glasi: Kada ćete, gospodine načelnice, upriličiti sastanak sa gradonačelnicima Gračanice, Lukavca i Tuzle i predložiti upućivanje zajedničke inicijative za rekonstrukciju ceste M4 na dionici Doboj – Tuzla? Dakle, nikakvu novost neću reći to je najoštećenija dionica trenutno u Bosni i Hercegovini. U zadnjih mjesec dana, neću se služiti izrekom uzduž i poprijeko, ali zaista bilo je dosta kilometraže koju sam ja prošla i sa sigurnošću mogu tvrditi da je cesta M4 na dionici Doboj – Tuzla najoštećenija. Ni u jednom momentu na toj cesti ne možete apsolutno ništa osim onaj volan držati sigurno kako ne bi uzrokovali neke nesreće. Alarmantno je pitanje i možemo pomoći svi u ovome, mogu i građani svojim peticijama, jer mislim da je došlo vrijeme, a iz media smo čuli koliko se odvaja za gorivo, za registraciju auta i tako dalje i da treba

početi pričati vezano za rekonstrukciju ove dionice. Ja sam takođe izvršila neko istraživanje koliko od samo jedne firme kamiona dnevno prođe tom cestom i nikom ništa. Oštećujemo svoje automobile i ja samo mogu reći da mi dobro pazimo na naše ceste, pa da nema toliko nesreća, jer smo svjesni koliko je ona oštećena. Tako eto to bi bila inicijativa, ali ja sam ju morala postaviti kao vijećničko pitanje i nadam se brzom odgovoru.“

Kemal Bratić, općinski načelnik: „I ja bih iskoristio priliku da sve poselamim i zaželim uspješan rad svim općinskim vijećnicima. I ja ću evo postaviti kontra pitanje kada ćete se vi kao vijećnica sastati sa vijećnicima grada Gračanice i grada Lukavca da pokrenete tu inicijativu. Ono što je najlakše i ono, da kažem što onako liči na vas, jeste da samo podnosite inicijative. Načelnik je podnio inicijativu bez sastanka i sa jednim gradonačelnikom i svakodnevno radimo na popravljajući infrastrukture. Evo vama za informaciju ekskluzivno ove godine ćemo raditi nastavak izgradnje trotoara Brijesnica – Klokočnica i rekonstrukciju raskrsnice u Maloj Brijesnici, te izradu projekta za raskrsnicu u Stanić Rijeci. Nažalost ovo je širok problem i ja to stalno govorim sa ove govornice najlakše je podnijeti inicijativu i najlakše je, da ne izazovem kontradikciju, politizirati. Mi smo pokrenuli inicijativu još prije godinu dana za izradu elaborata, odnosno projektne dokumentacije za brzu cestu Doboj – Tuzla koja bi riješila sve naše probleme. Riješila bi probleme prije svega plavljenja poljoprivrednog zemljišta od strane rijeke Spreče i na taj način bi i olakšali i vjerovatno će to, ako Bog da, u nekom narednom periodu biti. Međutim, vidjeli ste da je trenutno prioritet čini mi se Tuzla – Orašje ili Tuzla-Brčko, ali ja se iskreno nadam da će u narednom periodu doći do realizacije. Šta mi kao načelnici možemo? Možemo raditi ono što je isključivo u našoj nadležnosti. Ova cesta nije naša nadležnost, naša nadležnost su lokalni putevi i mi svi evo stavljamo prioritete, a naravno da koristimo svaku priliku na svakom mjestu da kažemo i svi oni znaju te podatke koje ste vi istraživali da je ovo najopterećenija cesta na Tuzlanskom kantonu. Znači vjerovatno najopterećenija. Čak su mi ovi iz Direkcije federalnih cesta govorili tačne podatke koliko to vozila godišnje prođe, jer imamo brojač ovdje, ako niste znali, u Stanić Rijeci. Ja bih najsretniji bio da ne moramo podnositi inicijative, ali nažalost vidite da se gradi dole i u Hercegovini. Mi ćemo raditi na tome i načelnik će svaku priliku koristiti da podnese takvu inicijativu, bez obzira da li se sastajale susjedne općine ili ne. Svi znaju za taj problem i niste vi nama ništa novo rekli, jer svi mi idemo i do Tuzle i do Gračanice. Nije toliko problem što je cesta u lošem stanju, veći je problem što je ona opterećena. Evo, ako se vi hoćete uključiti iz svog dvorišta na magistralnu cestu morate čekati najmanje 5 - 10 minuta. Mi radimo i radit ćemo, ja zajedno sa službama. Mi smo par puta podnosili inicijative, ali nažalost ti projekti nekada idu sporo i ja se iskreno nadam da će u narednom periodu i doći do rekonstrukcije i mislim da po planu od Tuzle do Orašnice ove godine ide rekonstrukcija magistralne ceste kada se radi o toj cesti.“

Nusret Dautović, predsjedavajući Općinskog vijeća: „Samo da konstatujem da je vijećnica Senada Džanić došla na sjednicu.“

Emira Karić, predsjednica kluba vijećnika SDP: „Ispravka krivog navoda ja sam postavila vijećničko pitanje i ne koristim vijećničku inicijativu u svrhu politizacije. Ja se zahvaljujem što ste mi dali prijedlog da se ja uključim u to preko Općinskog vijeća Gračanica. Ja smatram da ako je grupacija veća da se više taj eho čuje i zato je to bilo u tom smjeru. Kada je cesta u pitanju i kada je naša sigurnost u pitanju onda nema boje načelnika nego se sjedne i razgovara, a ja sam uputila vama zato što su po meni vaše ingerencije veće nego ingerencije općinskog vijećnika. Isto tako mogu pokušati prema općinskim vijećima da se udružimo da tražimo peticije i da tražimo što brže rješavanje.“

Nusret Dautović, predsjedavajući Općinskog vijeća: „Ima li još neko nešto po ovoj tački? Ako nema zatvaram vijećnička pitanja.“

## **USVAJANJE DNEVNOG REDA**

Nusret Dautović, predsjedavajući Općinskog vijeća: „Vi ste dobili meglom proširenje dnevnog reda sa još četiri tačke. Dvije tačke su upućene od općinskog načelnika vezano za zahtjeve firme Belamionix i Elektroprivrede a koje bi bile 7 i 8. tačka, te imamo od kluba vijećnika SDA prijedlog za promjenu dnevnog reda za dvije tačke:

1. Razmatranje i usvajanje prijedloga Rješenja o zamjeni predsjednika Komisije za budžet, finansije, privredu i dijasporu

2. *Razmatranje i usvajanje prijedloga Rješenja o zamjeni člana Komisije za pritužbe, predstavke i prijedloge građana, vjerske zajednice i vjerske slobode*

Ove bi tačke išle kao 9 i 10, tako da predlažem sljedeći dnevni red:

1. *Razmatranje i usvajanje prijedloga Rješenja za razrješenje članova Nadzornog odbora Javnog komunalnog preduzeća „Čisto“ d.o.o. Doboj Istok,*
2. *Razmatranje i usvajanje prijedloga Odluke o raspisivanju javnog oglasa za izbor i imenovanje na pozicije predsjednika i člana Nadzornog odbora Javnog komunalnog preduzeća „Čisto“ d.o.o. Doboj Istok,*
3. *Razmatranje Konačne rang liste za dodjelu stipendija redovnim studentima dodiplomskog studija,*
4. *Razmatranje i usvajanje prijedloga Odluke o dodjeli stipendija redovnim studentima dodiplomskog studija za akademsku 2021/2022. godinu,*
5. *Razmatranje i usvajanje Informacije o higijenskoj ispravnosti vode za piće i stanju vodoprivrednih objekata od:*
  - a. *JKP“Čisto“ Doboj Istok,*
  - b. *JZU Dom zdravlja Doboj Istok*
  - c. *MZ Brijesnica Mala*
6. *Razmatranje i usvajanje Informacije o zloupotrebi narkotičkih sredstava sa prijedlogom mjera za suzbijanje istih na području općine Doboj Istok,*
7. *Razmatranje zahtjeva Belamioniks d.o.o Brčko za davanje saglasnosti za prokopavanje javne površine na parceli kč. broj 1885 K.O. Velika Brijesnica,*
8. *Razmatranje zahtjeva JP Elektroprivreda Bosne i Hercegovine d.o.o. Sarajevo, Podružnica "Elektrodistribucija" Tuzla za davanje saglasnosti za prokopavanje javne površine na parceli kč. broj 2245, 1878 i 1862 K.O. Velika Brijesnica,*
9. *Razmatranje i usvajanje prijedloga Rješenja o zamjeni predsjednika Komisije za budžet, finansije, privredu i dijasporu,*
10. *Razmatranje i usvajanje prijedloga Rješenja o zamjeni člana Komisije za pritužbe, predstavke i prijedloge građana, vjerske zajednice i vjerske slobode.*

Slazete li se sa ovakvim dnevnim redom? Ima li neko primjedbi na dnevni red? Ko je za ovakav dnevni red?"

Glasanje: ZA – 16, PROTIV – 0, UZDRŽANIH – 0.

#### **REALIZACIJA DNEVNOG REDA**

**1. Razmatranje i usvajanje prijedloga Rješenja za razrješenje članova Nadzornog odbora Javnog komunalnog preduzeća „Čisto“ d.o.o. Doboj Istok**

Nusret Dautović, predsjedavajući Općinskog vijeća: „ Javlja li se neko po ovoj tački za riječ? Ukoliko se niko ne javlja ja bih ovu tačku stavio na izjašnjavaње. Ko je za?"

Glasanje: ZA – 16, PROTIV – 0, UZDRŽANIH – 0.

**2. Razmatranje i usvajanje prijedloga Odluke o raspisivanju javnog oglasa za izbor i imenovanje na pozicije predsjednika i člana Nadzornog odbora Javnog komunalnog preduzeća „Čisto“ d.o.o. Doboj Istok**

Nusret Dautović, predsjedavajući Općinskog vijeća: „ Dajem na raspravu ovu tačku. Javlja li se neko za riječ? Ukoliko se niko ne javlja stavljam ovu tačku na glasanje. Ko je za?"

Glasanje: ZA – 16, PROTIV – 0, UZDRŽANIH – 0.

**3. Razmatranje Konačne rang liste za dodjelu stipendija redovnim studentima dodiplomskog studija**

Nusret Dautović, predsjedavajući Općinskog vijeća: „ Javlja li se neko za riječ"

Emira Karić, predsjednica kluba vijećnika SDP: „ Zahvalila bih se komisiji. Drago mi je da su aplicirali u ovolikom broju naši studenti. Naravno neki su ostvarili pravo na stipendiju nakon današnjeg

glasanja, a ono što mi je neizmjerena drago to su mjesta 1, 2, 3, 4 i 5, to su prioriteti. Pogotovo Delić Enida 9,91 i to je za svaku pohvalu da imamo ovako dobre studente. Jako je dobro njegovati i na ovaj način ako ništa našu pamet samo će biti šteta ako to postane tuđa pamet.“

Izet Hodžić, zamjenik predsjedavajućeg Općinskog vijeća: „Poštovani načelnice sa saradnicima, uvažene kolege i kolegice opštinski vijećnici, poštovani opštinski sekretaru, tehnički sekretaru, mediji želim sve iskreno da vas poselamim i pozdravim. Kao predsjednik Komisije za mlade, društvene djelatnosti i informisanje osjećam potrebu da vas upoznam sa procesom što se tiče raspisivanja i same procedure za dodjelu stipendija za akademsku 2021-2022. godinu. Znači, Komisija je imala 4 sastanka i od prvog sastanka do prijedloga konačne rang liste radili smo stvarno korektno vodeći se zakonskim načelima, pravilnicima, kriterijima i ja ću u kratkim crtama da vas informišem i da vas upoznam mada je sve to vidljivo iz ovih materijala koje ste dobili u materijalima za ovu sjednicu Općinskog vijeća. Znači po raspisivanju javnog poziva za dodjelu stipendija prijavio se 41 student. Mi smo po isteku zakonskog roka predviđenog za prijave sazvali drugu sjednicu ove komisije, razmatrali materijale i izvršili preliminarno bodovanje, a mi smo to usvojili u kriterijima, kao što koleginja reče, studenti koji imaju ocjenu veću od devet ulaze bez bodovanja. Znači 41 student je aplicirao, a 20 je broj studenata koji dobivaju stipendiju. Mi smo to izbodovali i sve je transparentno, normalno predviđeno je poslovníkom i pravilnikom o radu i nakon bodovanja spisak, odnosno preliminarna rang lista je istaknuta na oglasnoj tabli općine Doboj Istok i postavljena na web stranici općine Doboj Istok. Kao što vidite u materijalima nije bilo primjedbi na tu preliminarnu rang listu i ta rang lista je predložena Općinskom vijeću na usvajanje. Ono što posebno želim da istaknem, a vidite na ovom drugom listu, da smo takođe kao i prethodnih godina vodili računa da što više i studenata dobije tu stipendiju. Čekali smo od Ministarstva za boračka pitanja da vidimo ko je od naših studenata sa područja općine Doboj Istok potpisao ugovor sa Ministarstvom za boračka pitanja i kao što vidite to je 13 studenata sa područja općine Doboj Istok. Tako da smo omogućili da što veći broj studenata sa područja naše općine dobije općinsku stipendiju. Mislim da smo uradili korektan posao po tom pitanju, a vodili smo se činjenicom da to bude stvarno korektno, da bude transparentno bez ikakvih neregularnosti i ponosan sam na rad članova ove komisije. Kažem ako ima nekakvih eventualnih pitanja stojim na raspolaganju. Još želim da kažem komisija je donijela zaključak koji nije obavezujući i prilikom planiranja sredstava za narednu godinu predložiti ćemo Općinskom načelniku da se sredstva koja se izdvajaju za ovu namjenu u narednoj 2023. godini shodno mogućnostima u budžetu povećaju za još pet stipendija. To ćemo vidjeti kada budžet bude u formi nacrt.“

Emira Karić, predsjednica kluba vijećnika SDP: „Meni je drago, kolega predsjedniče, što ste vi to doveli u red i to se mora zaista priznati da ne bi bilo riječi samo o tom politikanstvu. Bilo je prije priče, a da li je bila dobra, istinita ili ne istinita o tom potom, ali sada se sve manje priča o tim stipendijama, načinima bodovanja itd, i to mi je jako drago. Ono što je možda problem koji mi ne možemo riješiti je taj tajming, odnosno vrijeme kašnjenja određeno, ali takođe mi je drago što čekate gore sa nivoa budžeta TK i drago mi je što je dosta studenata zaista dobilo i moram reći da je prva tranša bila prije 10 dana. Znači, dobro je što idemo iza njih, jer pružamo mogućnost i da se i gore aplicira i ovdje i kada gledamo u globalu ostaje mali broj studenata poput moje Selme koji osim prioriteta ne mogu da ostvare uslove, a svi ovi koji mogu otprilike i ostvare. Meni je stvarno drago i vjerujte poznajem nekoliko studenata i koliko im bude drago kada legne ta njihova zaslužena stipendija. Slažem se da iduće godine ide možda blago povećanje, a vidjet ćemo kod samog budžeta. Hvala predsjedniče na urađenom poslu.“

Izet Hodžić, zamjenik predsjedavajućeg Općinskog vijeća: „Koleginica Emira je postavila pitanje, pa je dala i odgovor. Znači, nije nikakav problem što se tiče da se to stavi i ranije u proceduru uz saglasnost sa gospodinom načelnikom. Mi smo se vodili tom činjenicom i čekali smo, jer smo smatrali da je bolje da sačekamo konačnu odluku i konačno potpisivanje naših studenata sa Ministarstvom za boračka pitanja. U svakom slučaju nije dovedeno i neće biti dovedeno u pitanje isplata našim studentima. Puno znači i da nismo sačekali od ovih 13 možda bi 8 ušlo ovamo i drugih 8 studenata ne bi dobili te stipendije. Jedini razlog je te prirode i to smo mi vagali na svojim sastancima i jednostavno smo se usaglasili i donijeli takvu odluku. Mislim da se ta odluka ne krši nikakvim zakonskim načelima niti bilo čim. Znači ostavljena nam je takva mogućnost, a da li i druga gradska i opštinska vijeća rade na takav način. Ja imam nezvaničnu informaciju da su u Ministarstvu gore zadovoljni sa našim načinom i našim radom. Znači jedini razlog zašto je u ovom periodu to je te prirode.“

*Kemal Bratić, općinski načelnik: „Evo i ja da iskažem zadovoljstvo, prije svega radom komisije. Mislim da su i ove zadnje izmjene kriterija koje smo donijeli vjerovatno doprinijele da na svu sreću nema dosta problema. Ono što je bitno je da općina Doboj Istok isplaćuje stipendije redovno i možda čak i prije nego što to uradi kantonalno Ministarstvo za boračka pitanja. Mi smo nedavno na jednom zadnje dvije stipendije platili tako da smo očistili ove prethodne stipendije. Želim takođe da kažem da sam za to i da povećamo, ako Bog da, u narednom periodu broj stipendija, samo da to ne zaboravimo kada bude izrada budžeta. Mislim da ćemo tim povećanjem obuhvatiti sve one koji su zainteresovani da makar malo damo doprinosa za naše studente ili kako Emira reče za našu pamet. Ja to ne bih nazvao stipendijama, jer to je nekakva pomoć, jer stipendija je nešto sasvim drugačije i nešto više što obuhvata i stan i putovanje. Ovo je nekakva pomoć i možda evo predsjedniče komisije da razmislimo i o povećanju iznosa za narednu 2023. godinu s obzirom na ova dešavanja u Ukrajini i povećanja cijena vjerovatno i prevoza, stanarine, vode i svega drugog. Mislim da trebamo možda umanjiti neke druge stvari a povećati tu stavku. Fahro mi je malo prije uzimao izjavu i kao da sam znao da je komisija zauzela taj stav, ja sam to rekao u izjavi da ćemo u narednom periodu još povećati, a eto i ove godine smo povećali i to nam nikada ne treba biti ni mrsko ni teško ili puno.“*

*Nusret Dautović, predsjedavajući Općinskog vijeća: „Hvala lijepo, načelniče. Javlja li se još neko za riječ? Ukoliko se niko više ne javlja za riječ, dajem na glasanje ovu tačku dnevnog reda. Ko je za?“*

*Glasanje: ZA – 16, PROTIV – 0, UZDRŽANIH – 0.*

#### **4. Razmatranje i usvajanje prijedloga Odluke o dodjeli stipendija redovnim studentima dodiplomskog studija za akademsku 2021/2022. godinu**

*Nusret Dautović, predsjedavajući Općinskog vijeća: „Javlja li se neko za riječ? Ukoliko ne, glasamo za ovu tačku. Ko je za?“*

*Glasanje: ZA – 16, PROTIV – 0, UZDRŽANIH – 0.*

#### **5. Razmatranje i usvajanje Informacije o higijenskoj ispravnosti vode za piće i stanju vodoprivrednih objekata od:**

- a. JKP“Čisto“ Doboj Istok,**
- b. JZU Dom zdravlja Doboj Istok**
- c. MZ Brijesnica Mala**

*Nusret Dautović, predsjedavajući Općinskog vijeća: „Ukoliko ima potrebu neko od izvjestilaca da se javi za riječ neka izvoli.“*

*Emira Karić, predsjednica kluba vijećnika SDP: „Možemo se pohvaliti ovim izvještajima, odnosno informacijama i stanju u našoj općini kada je u pitanju voda, ali ja bih postavila pitanje da li imate neka predviđanja, jer svima su dostupni mediji i očekuje se jako sušno ljeto. Da li imate neka predviđanja da bi moglo doći do nestašice ili možete građanima ovdje obećati da do toga neće doći zato što su kapaciteti takvi i takvi. Možda predviđanja nisu ovakva, jer vidimo turbulencije su u zraku stalne, pa možda nešto na tu temu da vas pitamo da li zaista imamo dovoljno kapaciteta ili je to samo kapacitet kada su normalni uslovi, a ne neki vanredni.“*

*Elmir Babić, direktor JKP „Čisto“ doo Doboj Istok: „Dobar dan poštovani načelniče, predsjedavajući Općinskog vijeća, zamjeniče, uvaženi vijećnici, pomoćnici načelnika, mediji i ostali prisutni. Što se tiče vodosnabdijevanja u ovom sušnom periodu uz racionalnu potrošnju građana ne treba biti upitno. Međutim, javlja se problem da ljudi pune bazene, a jedan bazen je 5 kubika što može trošiti dnevno 10 domaćinstava. Zatim imamo zalijevanje, u vodosnabdijevanju sistema Brijesnica primijetili smo u večernjim satima kada bi trebalo doći do nivoa dizanja bazena mi imamo da ti nivoi stagniraju. Malo smo hodali po selu i vidimo da ljudi zalijevaju. Ako bude racionalna potrošnja ne bi trebalo bit problema. Znači u velikoj mjeri će zavisiti i od samih građana. Uz neracionalnu potrošnju bojim se da bi se mogao javiti neki problem.“*

*Emira Karić, predsjednica kluba vijećnika SDP: „Zahvaljujem se gospodinu direktoru. Otprilike sam i očekivala taj odgovor. Ja sam ovdje izašla sad sa prijedlogom da li bi bilo pametno da idemo možda od sljedeće sedmice za upućivanjem apela prema građanima, odnosno toj svijesti što vi kažete, pa da dijelimo po svojim Facebook profilima i da to bude na Facebook stranici općine da jednostavno malo uvijek*

podsjecamo ukoliko ne bude te racionalnosti da bi moglo doći i do određenih obustava. To je samo neki moj prijedlog, a uvijek kada se nešto uradi ima određenog pomaka boljeg nego da se ništa ne uradi.“

*Kemal Skopljak, vijećnik BPS: „ Pošto prvi puta izlazim želim da pozdravim i poselamim sve prisutne. Malo bih se samo nadovezao na ovu priču o vodosnabdijevanju u našoj općini. Što se toga tiče mi trebamo biti sretni i ponosni, jer u niz općina, pa i na Kantonu našem imaju strašne probleme što se tiče vodosnabdijevanja i imaju probleme što se tiče higijenske ispravnosti vode. Naše preduzeće koje vodi računa o tome stvarno dobro vodi računa i tehnički su napravili dobru stvar, jer nemamo redukcija nikakvih faktički još što reče maloprije direktor naš da građani malo manje zalijevaju ne bi imali glavobolje nikakve. Takođe što se tiče higijenske ispravnosti vidimo po ovim analizama da imamo izuzetno čistu i zdravu vodu.“*

*Hasan Hasančević, predsjednik kluba vijećnika SDA: „ Do danas smo imali vode bez redukcije, bez išta, a da li će biti redukcije ili neće pitanje je. Ja mislim da neće. Nisam ni za kakve apele jer valjda smo svi dovoljno pametni kada je suša da krenemo svi sami od sebe da to uradimo. Ja imam plastenik i ako ga ne zalijem šta ćemo sada. Sada imamo plastične proizvodnje kod dosta ljudi koji koriste gradsku vodu i nemaju drugog načina. Znači kada se svi uozbiljimo i budemo trošili onoliko koliko nam treba mislim da su toliko izdašni bunari, odnosno izvori da bi mogli imati vodu, ali o tom potom. Ovo što ću sada reći stanje vodnih objekata, pa se bojim da ne izazovem polemiku. Mi ašikujemo stotinu godina da uvežemo sve izvore u jedan i da napravimo vodni prsten u Doboj Istoku, pa ako treba da prodajemo, jer bi je tada imali i viška sa ovim izdašnim bunarima koje imamo. Pa molim sve kad odemo kući u svoje političke stranke u svoje mjesne zajednice i džemate da razmišljamo o tome u budućnosti. Imaju i predprojekti, imaju idejni projekti ima svašta nešto i da razmišljamo o tome kako namaketi sredstva da taj dio posla bude prioritet i općinskih struktura i komunalnog preduzeća.“*

*Kemal Bratić, općinski načelnik: „ Evo neko reče ratovi se vode zbog pitke vode i vodit će se vjerovatno i u budućnosti sve više i više, jer je sve manje i manje. Mi raspravljamo o higijenskoj ispravnosti vode i to je ono na šta ću se ja bazirati. Pored ovih nekakvih stvari koje su bile mislim da trebamo biti prezadovoljni prije svega što imamo vodu, zatim što je ta voda ispravna. Neki drugi su pokušali da je nađu, pa je nema ili je pronađu pa je neispravna. Ono što mi trebamo raditi u budućnosti jeste da onima koji to rade JZU Dom zdravlja i Komunalnom preduzeću da još više vode računa o toj ispravnosti, jer je previše dobro da je nevjerovatno da su ovakvi nalazi i da je 0 neispravnih. To je dobro i to je ono čemu mi trebamo stremiti. Da li će nje biti dovoljno u nekom narednom periodu to samo Allah zna, mi to ne možemo znati, jer znamo na kojoj su dubini bunari i ne možemo znati hoće li je nestati, može i sada, a može i u toku zime. Isto tako slažem se sa ovim da možda Komunalno preduzeće uz neke račune koje dostavlja na kućne adrese napravi jedan info letak, pa ne bi bilo loše da građane malo upozorimo da vode računa, naravno nisam za to da neko ne zalijeva plastenik ako ga ima. Imamo sad za sad, hvala Bogu, dovoljne kapacitete, ali ne trebamo je trošiti na zalijevanje trave ili nekih drugih stvari. I ja prolazim negdje pa vidim ljudi travu zalivaju i to je ono o čemu trebamo voditi računa. Tako da možda direktore stavite nekakav kratak info letak da se građani upozore da bi moglo doći, ne daj Bože, do smanjenja, ali ja se iskreno nadam da će biti i kiše pa će se smanjiti potreba za zalijevanjem ovih stvari o kojima sam govorio. Znači akcenat stavljam na još više ispitivanja na još više različitih mjesta i različitih lokacija iako mislim da je i ovaj uzorak na neki način zadovoljavajući, ali možemo još više i graditi i ulagati u nove vodne objekte. Znači ostao nam je još taj jedan bunar da napravimo rezervni i onda mislim da ćemo imati još manje problema, jer ćemo imati još kvalitetniju vodu. Mi u okruženju imamo mjesne zajednice koje nemaju dovoljno vode i ne znam kako ljudi žive i bili su kod mene na sastanku i ja sam predložio da susjedna općina uložiti u infrastrukturu i da kod nas ima dovoljno kapaciteta, međutim tamo se na Gradskom vijeću pričaju neke druge priče. Ja to ovdje javno govorim i ponovit ću gdje god treba i direktor je bio prisutan. Znači ja ne mogu dozvoliti da ugrozim stanovnike općine Doboj Istok, jer su oni meni prioritet broj 1. Isto tako sam solidaran i sa drugim općinama ako su spremni da uložiti u infrastrukturu, da obezbijede sebi infrastrukturu, a ne da je mi pravimo za druge općine i gradove. Spreman sam da nađemo kompromis da pomognemo našim susjednim mjesnim zajednicama koje nisu na području naše općine. Znači direktore ovaj letak da se napravi i da ga uručite građanima.“*

*Nusret Dautović, predsjedavajući Općinskog vijeća: „ Hvala lijepo načelniče. Javlja li se još neko za riječ? Zaključujem diskusiju i idemo na glasanje. Ko je za ove Informacije?“*

*Glasanje: ZA – 16, PROTIV – 0, UZDRŽANIH – 0.*

*Emira Karić je zatražila pauzu.*

*Predsjedavajući je dao 10 minuta pauze.*

*Senada Džanić je napustila sjednicu (opravdano).*

## **6. Razmatranje i usvajanje Informacije o zloupotrebi narkotičkih sredstava sa prijedlogom mjera za suzbijanje istih na području općine Doboj Istok**

*Nusret Dautović, predsjedavajući Općinskog vijeća: „Pošto nemamo nikog prisutnog od strane Policijske stanice Doboj Istok dobili smo dopis u kojem kažu da nemaju ovlaštenje, pa ću zamoliti zamjenika da pročita.“*

*Izet Hodžić, zamjenik predsjedavajućeg Općinskog vijeća: „Vezano za ovu tačku dnevnog reda dobili smo obavijest od Policijske uprave Gračanica, Policijska stanica Doboj Istok - U vezi vašeg Poziva na 18. redovnu sjednicu Općinskog vijeća, obavještavamo vas da komandir PS Doboj Istok, shodno članu 44. stav 1. tačka d) Zakona o policijskim službenicima Tuzlanskog kantona („Službene novine TK, broj br. 7 od 21.04.2022. godine), Etičkog kodeksa policijskih službenika MUP-a TK-a, br: 08-01-02.2.-353/15 od 17.12.2015. godine, Poglavlje 9.tački 9.1.2, 9.1.4,9.2.1 i 9.4.1, a zatim Instrukcije o pravilima ponašanja policijskih službenika Uprave policije MUP-a TK-a br:08-01-02.2-397/20 od 07.10.2020. godine član 7. tačka d), e) i s), nije obavezan da prisustvuje, odnosno nije ovlašten da daje odgovore na određena pitanja. Shodno navedenom, ukoliko bude određenih pitanja, upućujemo vas da ih pismeno prosljedite na Ured direktora Uprave policije MUP-a TK-a, (Portparol).“*

*Nusret Dautović, predsjedavajući Općinskog vijeća: „ Shodno ovom dopisu iz MUP-a ja predlažem pošto oni nemaju ovlaštenja da prisustvuju da mi tačku razmotrimo, a ako bude pitanja da uputimo pismeno kao što oni predlažu. Ja predlažem da razmatramo 6. tačku dnevnog reda. Slažete li se sa takvim prijedlogom? Imamo zaključak da ne razmatramo ako nema izvjestioca, ali shodno ovom dopisu koji su nam uputili, jer nemaju ovlaštenja i ponašaju se u skladu sa tim. Predlažem da pređemo 6. tačku dnevnog reda ako se slažu vijećnici.“*

*Emira Karić, predsjednica kluba vijećnika SDP: „ Onda bi mi, predsjedavajući, u ovom slučaju trebali izmjeniti svoj zaključak. Ne možemo tako preći preko onoga što smo donijeli i iza čega stojimo. Ja znam da je riječ o informaciji, ali isto tako informacije podnose i škole o uspjehu i upisu učenika i tu se pojave direktori ili onaj koga direktor ovlasti. Možda i u kodeksu obrazovanja isto to ima pa mi nismo navodili. Čudan mi je taj kodeks da neko ne smije doći i ja bih sada trebala naći taj kodeks pa isčitati je li to to ili je neko nešto drugo protumačio. Lično smatram da bi trebali donijeti neki zaključak, a onda sa tim zaključkom puštamo sve ostale da ne dolaze na Općinsko vijeće.“*

*Izet Hodžić, zamjenik predsjedavajućeg Općinskog vijeća: „ Evo mi smo ovu obavijest dobili u toku sjednice Općinskog vijeća i ja sam onako na prvu pitao a šta je dosad bilo. Međutim kada smo pročitali ovu obavijest znači navodi se da je u aprilu mjesecu ove godine došlo do izmjena. Znači ovo je zvanični akt obavijest i mi ne možemo nekoga pozivati na krštenje zakona. Ono što možemo uraditi i ja sam suglasan sa predsjedavajućim da ne skidamo tačku sa dnevnog reda, ona je u formi informacije i ja očekujem da će što se tiče informacija od MUP-a ovako biti i u buduću. Mi ne možemo sada pozivati načelnika Policijske stanice da mora doći, jer ako dođe krši zakonske norme i to je to. Oni su jasno u svom dopisu stavili i ja sam samo bio u dilemi šta je do sada bilo. Međutim, ovdje u dopisu piše 22.04.2022. da je donesena zakonska uredba na koju su oni pozivaju. Znači ne vidim ja tu nikakvih problema. Ako i drugi izvjestioci po drugim tačkama u narednom periodu imaju problema, nekakvih zakonskih normalno i to ćemo prihvatiti. Samo da u budućem programu rada Općinskog vijeća stavimo pored ovih informacija da iz razloga koji su navedeni da podnosilac, odnosno izvjestilac informacije nije obavezan da prisustvuje sjednici Općinskog vijeća.“*

*Kemal Bratić, općinski načelnik: „ Moram reći da je i mene malo iznenadila obavijest i ja sam odmah zvao ministra i uputili smo dopis ispred Općine Doboj Istok, ali vjerovatno nisu uspjeli da ovlaste nekoga da li PR ili nekoga iz stanice, to nas nije briga. Vjerovatno kada su donosili tu uredbu zaboravili su na ove stvari i ono što je čudno da ne može da odgovara na neka pitanja. Naravno da ne mora odgovoriti na neko pitanje koje će ugroziti. Pretpostavljam, a to je moja pretpostavka da je u nekim drugim općinama došlo do nekih*

*promašaja kada se radi o ovim informacijama da je možda neko nešto odgovorio što nije smio, pa je onda to zaustavljeno ili zakočeno da tako kažem kada se radi o ovim informacijama. Ja iskreno mislim da će ovaj problem biti riješen i nije to toliko velik problem, jer sve što treba da znamo je napisano ovdje u informaciji. Naravno da nam niko neće reći nešto ako se time ugrožava neka istraga ili nešto drugo kada se radio ovim stvarima koje su veoma delikatne i veoma opasne, niti bi mi to pitali. Tako da znate da sam uputio ministru dopis da u narednom periodu ovlaste nekoga, pa neka jedno lice bude za svih 13 općina, to nas ne interesuje. Nisam za to da skidamo tačku dnevnog reda i nije prvi puta da smo razmatrali neki izvještaj ili informaciju, a da neko nije bio prisutan, ali što god Vijeće odluči i ja ću se prikloniti toj odluci.“*

*Mehmed Mehinović, vijećnik SBiH: „ Prvo da kažem ja neću podržati ovu informaciju kao vijećnik. Drugo kao građanin Doboj Istok hoću da kažem nešto iza ove govornice i da uđe u zapisnik. Ja sam ogorčen na ovakav postupak, možda su to pravila njihova, međutim dokle to ide, jer oni izgleda hoće jednostranu saradnju. Hoće saradnju sa lokalnom zajednicom, ali da ona bude jednostrana i da njima lokalna zajednica bude uvijek na usluzi kada treba, da li treba goriva, da li treba radar, da li treba pomoć, daj od lokalne zajednice. Hoće da sarađuju sa lokalnom zajednicom i kada treba da daju izvještaj, Bože sačuvaj, to me je frapiralo. Naravno kada sam gledao materijale mislio sam podržati ovu informaciju i možda bih imao pitanja kako ide narkomanija, jer je očito da je ima u Doboj Istoku. Kako se bore sa tim? Hoće li biti bolje? Međutim iz ovih razloga neka ide točka, ali ja ću biti suzdržan po ovom pitanju.“*

*Emira Karić, predsjednica kluba vijećnika SDP: „ Možda ću upravo ovo i ponoviti budući da se informacija odnosi na lokalnu zajednicu nekako je potrebna ta dvosmjerna komunikacija. Takođe mi je sve ovo upitno i često puta ja pročitam prijedlog mjera i često puta se u izvještajima i informacijama poboljša prijedlog mjera zahvaljujući diskusijama na toj samoj sjednici. Sada da li će oni uzeti zapisnik ili će samo zadržati dopis da mi postavljamo pitanja MUP-u TK, kako sam razumjela, a ne Policijskoj stanici Doboj Istok, mislim da to nije dovoljna komunikacija. Takođe klub će biti suzdržan kada je u pitanju ova tačka.“*

*Nusret Dautović, predsjedavajući Općinskog vijeća: „Ja bih da se prvo izjasnimo da li da stavimo tačku na dnevni red. Ko je za da ova tačka ide na dnevni red?“*

*GLASANJE: ZA – 10, PROTIV – 1, SUZDRŽANIH – 4.*

*Konstatujem da sa 10 glasova za ova tačka ide na dnevni red.“*

*Hasan Hasančević, predsjednik kluba vijećnika SDA: „ Zaista nisam mislio diskutovati. Prihvatio sam tačku dnevnog reda da ide iz principijelnih razloga, ali ovo je za mene u najgrublju ruku omalovažavanje Vijeća ili minimiziranje, kako god hoćete. Bio sam vani dok je Izet pročitao dopis tamo se spominje 2020. službene novine taj i taj, taj i taj, pa evo sad smo se sjetili da ne možemo doći. Informacija kao informacija ona je u principu za Vijeće ili za ono za šta mi izglasamo za podnosioca informacije neobavezujuća u postupcima sljedećim, ali kao što reče koleginica Emira razmijenimo mišljenja za poboljšanje. Složio bih se sa Mehinom diskusijom u potpunosti. Ovdje imamo probleme, ako smo čitali, povećanje upotrebe narkotičkih sredstava, nama izgleda brojka 8 i brojka 5 je mala, ali razlika je 3 i kada to pretvorimo u postotak za općinu Doboj Istok, to je problem. Ogroman problem. Imamo problem u rasturanju narkotičkih sredstava najmanje za 35 % više nego u periodu od prošlog podnošenja izvještaja. Ako je komandir ili ko je već uputio dopis smatrao da ne treba doći i surađivati sa nama, a u prijedlogu mjera za suzbijanje upotrebe narkotičkih sredstava i svega ostalog pozivaju se građani, poziva se lokalna zajednica općina Doboj Istok, poziva se Centar za socijalni rad, pa gdje je tu kodeks. Gdje tu tajnost podataka ili bilo čega drugog? Neću reći da im neko nije naredio da ne idu, odnosno da ne dolaze. Evo dobili smo dopis, neko je zvaničan stao iza toga, a od strane lokalne zajednice oni su imali pomoć u bilo čemu i od načelnika i od Vijeća. Ako se sjećate zaštite određenih policijskih službenika na ovom Vijeću u prošlom mandatu, dizanja kompletnog Vijeća po pitanju kriminala, jer desila se pucnjava, bankomat kada je razvaljen itd. upotreba sile je bila na raznorazne načine i mi smo stali kao Vijeće, kao društvena zajednica, načelnik i svi da stojimo iza tih ljudi koji sprovode to. Sa naše strane je korektno. Ovo da li će biti korektno, evo načelnik je kazao da je uputio dopis, jer ne može neko doći iz Tuzle i pričati o ovome, treba neko ko je ovdje i ko je upoznat sa tim problemima. Vidjet ćemo u narednom periodu šta će se desiti. Predsjedavajući, tražim poslije diskusije 5 minuta pauze.“*

*Kemal Skopljak, vijećnik BPS- a: „ Ja ću se samo malo nadovezati na prethodne diskusije. Znači, potpuno se slažem da je ovo omalovažavanje Općinskog vijeća Doboj Istok. Ovdje je volja građana, ovdje je želja, ovdje je da sarađujemo sa svima preko nas i naravno da njihovu volju iskazujemo. Oni su*



zainteresovani, građani su zainteresovani za stanje u svojoj sredini i u svojoj mjesnoj zajednici. Ne vidim kakav je problem pitanje iz izvještaja koji je već nama dostavljen i da mi postavimo ovdje pitanje i da nam se samo malo objasni i da učestvujemo u tome da sarađujemo sa njima da damo prijedlog. Ne vidim stvarno u čemu je taj problem i čemu tolika tajnost da ne smije neko doći da kaže šta se događa u Doboj Istoku, a vidimo da imamo problema, jer je sve povećano po ovom izvještaju. U svim indexima koji su nam dati sve je povećano. Znači, ima problema i sada je problem da dođe komandir policije da sa njim ako ništa prodiskutujemo. Ja ću biti u svakom slučaju i protiv ovog izvještaja iz naravno svojih razloga.“

Emira Karić, predsjednica kluba vijećnika SDP: „ Kolega Hasan je inicirao ove diskusije, a ja sam planirala ni ne javljati se. Ja ću vas zamoliti da obratite pažnju na tabelu, da mi se malo ovdje iz konsultujemo kad već nemamo koga pitati, kaže posjedovanje i uživanje i pogledajte godišta 83, 83. godišta, 90. godišta. Da li je to samo posjedovanje i uživanje? Sva ova godišta 30 + su meni alarmantna. Da li se radi o velikom broju onih koji kako mi kažemo rasturaju drogu na općini Doboj Istok? E to je problematično. Drugo je kad ti nekog uhvatiš sa nekom malom dozom, a ako se ovdje radi za koje sam rekla šta bi mogle raditi eto je onda veliki veliki problem.“

Refik Šuvalić, vijećnik SDA: „ Gospodine predsjedavajući, zamjeniče, načelnice, kolegice i kolege, pomoćnici, predstavnici medija da vas sve poselamim i pozdravim. Ja mislim da ovo nije stav našeg komandira sigurno, jer on bi došao. Drugo, ne bih da se vraćamo, ja bih mu i sad dao najveća priznanja od tog momenta, jer znamo da i dan danas u tom dijelu kad su takva dijela u pitanju imamo veliki napredak, odnosno maltene da je to svedeno ispod nule. Znači u tom dijelu ne bi da usmjeravamo u pogrešnom smjeru diskusiju. Drugo, koliko smo mi svi, evo Emira i ja sam htio malo vezano za te podatke, da mi znamo da ljudi nažalost biraju najosjetljivija mjesta gdje se okupljaju oni najkritičnije od 16 godina djevojčice i dječaci. Takva mjesta oni biraju, posjećuju, obilaze i prave sebi nove potencijalne kupce. Mi smo uspjeli, ne znam zbog kojih akcija, žutu zemlju riješiti, ali nažalost sada kod šehidskog imamo neke dvije klupice gdje dolaze djevojčice i dječaci u tim godinama od 10 do 15-16 godina i tu im je centar. Slabo i mi to prijavljujemo i kada vidimo. Imamo slučaj dok je bio aktuelan stadion u Klokotnici komšija prvi, pa kaže imam ja unučad, da ja prijavim njih, ja imam unučad. Njega je strah sada ako prijavi kakva će reakcija biti na njegov unučad. Ja mu kažem daj reci meni evo ja ću prijaviti. Svi moramo dati veliki doprinos i ne bih ja sad previše tu krivio ovo. Zato sam da mi ovdje te neke stvari, kad ovu informaciju prihvatimo nebitno na koji način ili ne prihvatimo, ali da mi određene ove prijedloge, a znaju i oni ja mislim dosta, ali moraju malo više. Ja čujem da oni imaju problem malo i sa vozilima i sa ljudstvom, ali ne bi smio to biti problem kad je, pogotovo ova pošast u pitanju. Evo neko je rekao da će biti pauza, pa ćemo se oglasiti, međutim da nam je ovo problem, problem je.“

Kemal Bratić, općinski načelnik: „ Mislim da nam je diskusija otišla u pogrešnom pravcu. Mislim da niko nije imao namjeru nikoga da omalovažava, nikoga ne branim, da me pogrešno ne shvatite, jednostavno vi znate kakav je rad u policiji da je to maltene vojna struktura i da se mora poštovati hijerarhija. Ono što ja znam jeste da ni jedan komandir ne može dati izjavu bez saglasnosti za medije. Naravno sve pometnije je napravila od aprila ta uredba ili odluka i vjerovatno su ljudi uhvaćeni u raskorak i nije uspjelo to da se premosti. Ne možemo sada zbog jednog gafa da bacimo niz vodu nekakvu saradnju između Vijeća i stanice i i evo načelnika stanice koja je bila u prethodnom periodu. Mislim da nije lijepa poruka. Vi uradite kako god hoćete i šta god hoćete ja govorim svoje mišljenje. Ono što ja znam jeste da je dosadašnja saradnja bila dobra i korektna. Slažem se i sa ovim da smo mi možda i bolji i korektniji i da dajemo više nego druge lokalne zajednice. Uradili smo još jedan korak video nadzora i idemo dalje, ako Bog da, upravo da olakšamo tim ljudima. Ono što je Izet diskutovao jeste da imaju oni vozila, malo im je problem u ljudskim resursima i idemo u tom pravcu da se poveća sistematizacija. Svaka ustanova ima svoju sistematizaciju i ne može biti 6 profesora ako je po sistematizaciji 1. Ja sam već razgovarao da vratimo ono što je prije bilo da Doboj Istok ima svoju stanicu, jer ovo sada nije stanica i ne znam kako se zove, nekakva ispostava. Znači da ima svu onu infrastrukturu. Ono što je najbitnije iz mog ugla gledanja Doboj Istok je karaula, kao i Čelić, Teočak i Sapna. Na tome mi trebamo raditi i u borbi protiv narkotičkih sredstava i u raznim drugim borbama kojih će ne daj Bože biti. Znači, to je naš problem i ja vas molim da se svi izdignemo i da pređemo preko ovoga. Naravno i mene je frapiralo kada sam dobio, pa sam se naljutio, pa sam i zvao i slao dopis. Kada sam sve sagledao i dobio određene informacije mislim da to nije namjerno, niti da koga omalovaži ili da koga uvrijedi ili da koga ne poštuje, jer takva je naredba i to se mora poštovati. Isto kao što se naredi u nekom drugom preduzeću u nekoj drugoj školi, znači naredba se mora poštovati. Oni jednostavno nisu smjeli, jer je neko

rekao da ne smiju. Ja bih vas zamolio da se više ne rasplamsavamo oko toga, jer imamo u 12 sati prijem komandanata povodom Dana brigade i da polako privodimo kraju i ovu tačku i ove sljedeće koje nas čekaju.

Izet Hodžić, zamjenik predsjedavajućeg Općinskog vijeća: „ Javio sam se za riječ prije primjedbe načelnika. Želim da me ne shvatite pogrešno i da se stavljam, kao što načelnik kaže, u poziciju da nekoga branim ili suprotno. Pročitao sam i želim da kažem Zakon o policijskim službenicima Tuzlanskog kantona 21.04.2022. godine i sve je sada u sferi nagađanja. Dobro bi bilo da je prije ove sjednice Općinskog vijeća komandir Policijske stanice Doboj Istok možda predsjedavajućeg ili načelnika, a možda nije kasno ni poslije ove sjednice da da obrazloženje a može biti i usmene naravi. Koliko ja vidim ovdje dana su ovlaštenja službi za informisanje i možda ubuduće mi kod ove tačke dnevnog reda trebamo Ministarstvu, odnosno toj službi potparolu da dostavimo i da njih pozovemo. Vjerovatno komandir nema ovlasti da daje ikakve informacije. I ja se slažem da smo mi ovdje zaštitnici interesa građana, ali ovo su neki novi momenti i vjerovatno je u tom zakonu koji je donesen u aprilu ove godine rečeno šta može komandir, a šta ne može i ko može biti tu i davati potrebna objašnjenja.“

Nusret Dautović, predsjedavajući Općinskog vijeća: „ Hvala lijepo Izete. Javlja li se još neko za riječ? Ako se ne javlja pauza od 5 minuta na zahtjev kluba SDA.“

Sjednica je nastavljena u 11,25 sati.

Nusret Dautović, predsjedavajući Općinskog vijeća: „ Pošto smo iscrpili diskusiju po ovoj tački dajem na izjašnjanje. Ko je za ovakvu informaciju?

GLASANJE: ZA – 10, PROTIV – 1, SUZDRŽANIH – 4.

Konstatujem da sa 10 glasova za ova tačka je usvojena.“

## **7. Razmatranje zahtjeva Belamioniks d.o.o Brčko za davanje saglasnosti za prokopavanje javne površine na parceli kč. broj 1885 K.O. Velika Brijesnica**

Nusret Dautović, predsjedavajući Općinskog vijeća: „ Dajem tačku na raspravu.“

Emira Karić, predsjednica kluba vijećnika SDP: „Da kažem da me je već jednom zabolila glava vezano za ovaj problem sa Belamioniksom, da tako kažem, pa mogu reći raspao mi se i školski odbor na toj tački. Naravno svako ima pravo da odlučuje onako kako želi. Nije lagana tema samo da se razumijemo. Puno sam informaciju dobila, da ne pričam sada o tim vodnim saglasnostima šta sve treba i tako dalje. Opet, meni je žao što nema direktora, postavila bih pitanje taj bioprečistač znači on je bio uvjet kako sam ja razumjela od strane kada je DMDE krenuo u taj projekat. Da li postoji taj bioprečistač, jer on rješava mnogo problematike ove odluke. Znači kada bi neko zaista stao iza ove govornice i rekao da to postoji, a vjerovano se neće moći dobiti određene dozvole ako toga nema. Ja bih dala jedan prijedlog. Neću sada u širu diskusiju, jer mene zaista raduje ekonomski razvoj ove općine i ovo je jedan od načina tog ekonomskog razvoja, ali moramo razmišljati i o drugim građanima onima kojima bi taj ekonomski razvoj možda na neki način i naštetio. Ja imam jedan prijedlog, a to je da opet napravimo pauzu da u stavci II gdje se kaže Ovlašćuje se općinski načelnik općine Doboj Istok da preduzme sve pravne radnje u vezi realizacije ovog zaključka da poslije toga ide i rečenica da u slučaju nastanka određenih problema za iste iznađe mogućnosti rješavanja. Da li će doći do problema, da li neće, mi veoma dobro znamo da nemamo kanalizacionu mrežu, da imamo ova tačka ne bi bila vjerovatno na dnevnom redu. Budući da nemamo mnogo je upitnika u glavi da li postojeći kanal može pretrpjeti još jedan priključak. Ovo je ozbiljan priključak, jer imamo mjesnu zajednicu, škole i možda to služba može bolje pojasniti. Sa dodatkom tog dijela rečenice ja bi dvije ruke digla za što se tiče ove odluke. Ako nema tog dodatka stvarno moram biti oprezna.“

Mehmed Mehinović, vijećnik SBiH: „Hvala bogu meni je veoma drago naša opština se razvija jednom uzlaznom linijom u svim segmentima, čini mi se, a pogotovo privrednom i ne može svima nama da bude krivo. Međutim drago je svima vjerovatno kao i meni. Vjerujte dođe vrijeme kad u životu inače kad je sve dobro i kad nastane problem valja platiti neku cijenu zato što je bilo dobro. Ovo je dobro znači međutim valja donijeti neku odluku koja baš nije i valja platiti cijenu za to. Ja lično nemam dileme, ja sam za ovakvu odluku, jer 40 ljudi zapošljava na opštini i to probija sve neke eventualne segmente. Međutim zaista nemam namjeru nikoga da prozivam, mislio sam da malo duže elaboriram, međutim moramo požuriti u 12 dolaze komandanti i poštujem to i to zaslužuje da prekinemo sjednicu ako treba. Znači nemam dileme podržat ću

ovakvu odluku, pa platit ćemo cijenu. Hoću da kažem da sam razgovarao sa nekoliko ljudi juče i sinoć i jutros za kafom smo razgovarali. Nisu to bilo kakvi ljudi evo lično sa mojim bratom koji je dole ispod Belamioniksa, pa koji će imati određene probleme u odvodnji tih voda. Međutim valja sada, ovo što je Emira rekla, naći neku mogućnost, naći neku soluciju da to ne bude tako, jer ja nisam mislio ni diskutovati nego odmah podržati ovo. U obrazloženju ove odluke stoji odvodnja oborinskih voda sa poslovnog objekta u Brijesnici Velikoj. Nema tu nikakvih problema, međutim kada sam pročitao zahtjev Belamioniksa oborinskih i fekalnih voda stoji. Ako je predmet građevinske dozvole bio i bioprečišćač i treba vidjeti ako ima bioprečišćač nemamo šta diskutovati trebamo svi podržati ovu odluku, jer nam je interes i nema dileme nikakve. Predmet jest bio i bioprečišćač. Sada da ne govorim da smo u prošlom sazivu donijeli odluku da ćemo na jednoj parceli praviti Centar za socijalni rad, a vidim i ta se parcela uređuje. Znači ja ću podržati ovu odluku i to nije sporno zbog privrednog razvoja općine, ali bilo bi dobro ovo što je Emira predložila da se nađe neko rješenje i da nam neko pojasni ima li bioprečišćač, hoće li čovjek raditi bioprečišćač ili neće. Ako neće raditi imat ćemo problem, jer će se to začepiti, jer to nije prava kanalizacija. To ljudi znaju koji žive dole, a de Bože sad glasaj protiv nečega što može da zaposli 40 ljudi, pa možda će neko moj raditi. A i da neće raditi niko moj, svi su moji u Doboj Istoku i ko god se zaposli moramo tako razmišljati. Prema tome meni je samo problem znači ovdje u ovoj odluci, a ako i ne bude to objasnio neko ja ću opet dignuti ruku, vjerujte mi. Hoću, to sam odlučio i svađat ću se sa bratom rođenim ako treba i reći ću mu da je ovo cijena koju nekad predstavnički organ mora platiti. Vjerujte mi imat će izvršni organ u problema sa građanima i sasvim ako dođe do ovih problema, a vjerujte doći će. Ja sam to sagledao i ne može primiti ako nema bioprečišćača i to sve ide na poljanu. Neki su ljudi predlagali da se to može i jeftino završiti ne znam ni ja kako, pa evo u tom smislu da neko ne kaže da nismo makar potegnuti pitanje. Brat moj lično kaže da sve oborinske vode sa magistralnog puta M4 odoše dole. Ja sam uradio neku rešetku da malo odvedem i ako se ta rešetka ne stavi ponovo, ja ću biti poplavljen čitavo vrijeme. Prema tome ima nekih određenih problema međutim ne treba doći do investitora da smo zakočili. Kako je Emira rekla da općina preuzme obavezu da će rješavati u hodu neke stvari ako dođe do određenih problema. Ništa nije zlonamjerno, jednostavno razmišljam trezveno i kao građanin.“

Izet Hodžić, zamjenik predsjedavajućeg Općinskog vijeća: „ Poštovat ću vrijeme, jer imamo malo manje od pola sata. Vjerovatno se od mene očekuje diskusija u nekakvom drugačijem pravcu ili smjeru. Međutim ja sam za poštivanje slova zakona. Ove dileme oko prečišćača i svega ostalog ja ne želim apsolutno da dovodim u sumnju, jer investitor sam jednog sličnog objekta i mislim ako je zakon jednak za sve i ne vidim ja to uopšte problem. Znači ta firma i ovaj objekat sigurno ne može dobit potrebne papire za rad, upotrebnu dozvolu, ako ne zadovoljava između ostalog i ove uslove. Prema tome ja hoću da vjerujem da je to tako. Pred nama je tačka dnevnog reda samo prokopavanje i da mi damo saglasnost na prokopavanje tog kanala koji je u vlasništvu opštine, odnosno puta koji je u vlasništvu opštine Doboj Istok. Jednostavno ja ne mogu da vjerujem da takav objekat i slični objekti neće imati potrebne objekte, te prečišćače za uključivanje. Znači zakon je predvidio ili prečišćač ili u javni odvod tih površinskih voda i fekalnih, znači uključivanje u kanalizacioni sistem. Ja vjerujem kantonalnim službama koje daju određene dozvole i našoj općinskoj da će to biti u sklopu i sukladno zakonskim propisima. Kažem ovo je pretpostavka, jer se jednostavno to ne može izvesti na nekakvu njivu ili nekakav kanal i sve ostalo. Znači ovdje je akcenat na tome da mi damo suglasnost za prokopavanje tog puta koji je u vlasništvu općine Doboj Istok. Ja kažem da sam ja imao, neću reći probleme, ali takva je zakonska procedura napravi to da bi uradio dobio to. Ja sam uvjeren da će se poštovati slovo zakona. Ako se dobila urbanistička i ako se dobila građevinska zna se koji su kriteriji da se dobije upotrebna dozvola i to je to.“

Kemal Skopljak, vijećnik BPS: „ Ja ću se samo kratko nadovezati na ove diskusije i sve bih ih do jedne podržao. Znači u ovoj našoj odluci predložio bih da ubaci ova riječ prečišćač, da bude u sklopu naše odluke koju danas donosimo ovdje. Znači da ona bude obavezujuća na neki način, jer sve ovo što mi pričamo ako nešto ne ubacimo na papir to je mrtvo slovo, kao da ništa nismo rekli. Danas sutra, kao što kaže gospodin Mehinović može biti problema. Hajmo mi da se ogradimo od problema i ovo je odličan prijedlog da će u slučaju bilo čega opština da interveniše i to samo da ubacimo u našu odluku. Niko nije protiv, vjerujte i ako ne ubacite ja ću biti za ovu odluku, ali dobro bi bilo da iskoristimo priliku da se ogradimo mi kao Opštinsko vijeće a ujedno da iskoristimo neke stvari, pa neću reći od Belamioniksa, a moram na kraju reći i od njihov zašto da ne. Da oni riješe svoj problem, a ujedno i mi rješavamo svoj.“

Kemal Bratić, općinski načelnik: „Nisam se mislio javljati, ali neke me diskusije ponukaše. Znači ne treba da stoji negdje tamo da načelnik iznađe, jer načelnik će iznaći mogućnost ako bude problema. Ono što ja

znam jeste da ljudi rade sve isključivo po projektu i ono što znam je da postoji taj kolektor ili prečišćač. Ljudi tvrde da će voda ići čista. Vi ste sada njima samo uvažena direktorice povećali troškove, jer niste dozvolili da se ide ispod škole. Ako mislite da ne treba da damo ja sam i za to. Ja mislim da treba da damo. Trebali ste preuzeti odgovornost, jer ljudi bi to do sada već završili i ne bi danas o ovome uopšte raspravljali. Zašto se raspao neki školski odbor, ja ne znam. Ja mislim da svakome onome ko hoće da radi, pogotovo da zapošljava mi trebamo pomoći i izaći u susret. Naravno u okviru zakonskih osnova i da bude sve po propisima i da ne ugrožava druge građane. Ja ne znam kako će nekoga ugroziti, a mi smo dali nalog da se radi projektna dokumentacija da taj kanal ucijevamo i natkrijemo. Nije to samo od Belamioniksa mi ćemo riješiti problem kompletnog zanatskog centra vezano za odvodnju tih voda. Evo pomažu na neki način. Ništa nisam uradio bez saglasnosti Savjeta Mjesne zajednice. Znači ljudi su za, a da su oni protiv i ja bih rekao da sam i ja protiv. Ne bi raspravljali da se to moglo riješiti na brži i jeftiniji način. Ne znam da li je Ministarstvo moralo davati saglasnost da ide ispod školske dvorane, ovdje su sada povećani troškovi. Ponavljam ono što znam je da ljudi isključivo rade po projektu. Pitali su me između ostalo smiju li uraditi onaj put koji ide oko dvorane o svom trošku, pa naravno da smiju. Pitali su me smiju li urediti ono naše općinsko zemljište? Što ne bi uredili. Evo ljudi hoće da investiraju i da pomognu nama, da napravimo parking mjesta i da se konačno završi taj tržni centar. Drago mi je da su vijećnici prije mene diskutovali i da će podržati ovo. Nema potrebe za pauzom, jer svaki problem koji bude ja ću ga prvo saznati i prvo će doći do mene. Naravno ako bude da građani, ne daj Bože, budu ugroženi stojim na raspolaganju da to rješavam. Ja bih mogao predložiti da se zadužuje Općinsko vijeće, jer vi dajete saglasnost, ne dajem je ja. Mislim da se ne trebamo više rasplinjavati, jer odluku treba donijeti. Ona je za dobrobit naših građana, za zapošljavanje novih ljudi i za rješavanje kompletnog problema ondje u onom dijelu, ne samo Belamioniksa, nego i škola, mjesne zajednice, ambulante itd.“

Emira Karić, predsjednica kluba vijećnika SDP: „ O prekopavanju školskog dvorišta ne odlučuje direktorica ili direktor škole, to odlučuje školski odbor. Sam direktor Belamioniksa je nekoliko puta naglašavao moj fer odnos od samog početka rješavanja ovog problema. Što se tiče mog prijedloga da se u odluku unese ona rečenica, evo ja ću povući taj prijedlog zato što ste izašli načelnice, objasnili i evo sve fino stoji u zapisniku, tako da ću takođe podržati ovu odluku.“

Mehmed Mehinović, vijećnik SBiH: „ Nikakav problem ovdje ne bi bio, a općinska odluka je posve dobra, ali da u zahtjevu Belamioniksa nije stajalo oborinskih i fekalnih voda. To je zbunilo građane, a zbunilo je i mene da samo nije bilo fekalnih nikakav ne bi bio problem. Zašto stoji fekalnih ako ima prečišćač, jer je onda kao oborinska voda. To je problem, nikakav drugi problem nije. Bio sam na terenu i vidio, ono je katastrofa, građani su ugroženi, ali sada će biti u povećanim količinama. Duplo više nego sada. Nema dileme, ali hoću da uđe zapisnik. Ja ću ovo podržati i platiti ću cijenu rekao sam, jer cijena se mora platiti ko hoće da bude načelnik, ko hoće da bude vijećnik. Mora nekad doći kad nije lijepo i donosi odluke. Ja ću dignuti ruku, ali hoću da uđe u zapisnik šta sam ja diskutovao da mogu voditi dijalog sa ljudima.“

Refik Šuvalić, vijećnik SDA: „ Ja ću samo jednu rečenicu. Obzirom da smo imali slučaj ovo o čemu je Mehmed Mehinović govorio, a i mi smo u toku obzirom da imamo tamo svoje šahta. Znači Abdulahu ako ti nije došao zahtjev od mjesne zajednice Brijesnica Velika gdje je u pitanju tamo onaj put prema Šemsi Bećiroviću i dole Vrbi da u isti zahtjev stavite i ovo pitanje. Ovdje najveći problem pravi ova voda sa asfalta. Znači prema direkciji pošto je to nije nadležnost naša i da mi ne bi čačkali nešto, a i sam izvođač radova, odnosno investitor Belamioniks ne smiju u putnom pojasu. Znači samo da se vidi da Mjesna zajednica doda i to i da se riješe ove površinske vode koje idu sa asfalta i gdje bi se spasilo ovo naselje i sama škola dole. Znači samo to da bude, a ovo u svakom slučaju treba prihvatiti.“

Nusret Dautović, predsjedavajući Općinskog vijeća: „ Hvala lijepo. Ima li se još neko? Zatvaram raspravu. Ko je za ovaj zahtjev Belaminoniksa?“

Glasanje: ZA – 15, PROTIV – 0, UZDRŽANIH – 0.

#### **8. Razmatranje zahtjeva JP Elektroprivreda Bosne i Hercegovine d.o.o. Sarajevo, Podružnica "Elektro distribucija" Tuzla za davanje saglasnosti za prokopavanje javne površine na parceli kč. broj 2245, 1878 i 1862 K.O. Velika Brijesnica.**

Nusret Dautović, predsjedavajući Općinskog vijeća: „ Javlja li se neko za riječ? Ko je za?“

Glasanje: ZA – 15, PROTIV – 0, UZDRŽANIH – 0.

**9. Razmatranje i usvajanje prijedloga Rješenja o zamjeni predsjednika Komisije za budžet, finansije, privredu i dijasporu**

Nusret Dautović, predsjedavajući Općinskog vijeća: „Javlja li se neko za riječ? Ko je za?“  
Glasanje: ZA – 15, PROTIV – 0, UZDRŽANIH – 0.

**10. Razmatranje i usvajanje prijedloga Rješenja o zamjeni člana Komisije za pritužbe, predstavke i prijedloge građana, vjerske zajednice i vjerske slobode.**

Nusret Dautović, predsjedavajući Općinskog vijeća: „Javlja li se neko za riječ? Ko je za?“  
Glasanje: ZA – 15, PROTIV – 0, UZDRŽANIH – 0.

Sa ovom tačkom iscrpili smo dnevni red. Zahvaljujem se svim vijećnicima i vidimo se u ponedjeljak na svečanoj sjednici.“

Sjednica je završena u 11,45 sati.

ZAPISNIČAR  
Behara Hadžić

SEKRETAR OPĆINE  
Omer Hadžić

PREDSJEDAVAJUĆI  
OPĆINSKOG VIJEĆA  
Nusret Dautović

Zapisnik je usvojen na 19. redovnoj sjednici Općinskog vijeća Doboju Istok održanoj dana 29.09.2022. godine.

U Klokočnici, dana 29.09.2022. godine

Zabilješku sačinio  
Omer Hadžić, sekretar Općine